



## Comunicado di Prensa

### **E confusion con trata abuso sexual di mucha t'ey keto bay!**

Segun Fundacion Respeta Mi awor si mester haya contesta riba e siguiente preguntanan mas pronto posibel:

-Con e trayecto pa señala y denuncia abuso di mucha ta cana realmente?

-Con e parti huridico ta den caso di determinacion y persecucion di e abusador?

Pa medio di un carta dirigi na Parlamento, Ministernan concerni y un comunicado di prensa, e fundacion a trece esaki dilanti caba na luna di Maart e aña aki. Pero te ainda por mira den practica cu poco ta ser haci.

Loke ta concerni e trayecto pa señala y denuncia, ta existi hopi confusion kico ta y no ta abuso sexual. Esaki ta conta pa mayor y pa profesional cu tin di haber cu mucha, victima di abuso sexual. Despues di señala un probabel caso tin confusion, kico lo ta e siguiente paso. Mester bay polis mesora of mester haci investigacion otro caminda prome? Si e persona cu tin sospecho di abuso sexual cerca un mucha no ta sigur kico a pasa, kico mester sosode e ora ey?

Fundacion Respeta Mi ta sostene e hecho cu nos comunidad a kibra e taboe tocante abuso sexual, cu tabata existi asina largo. Awor nos ta den un otro epoca caminda e famia di victimanan kier haya husticia y ayudo. Nan ta bay publico cu nan experiencia, cu e meta pa preveni pa mesun cos no sosode cu otro hende. Tambe nan ta busca oido den e trayectoria cu nan ta aden. Esaki sigur ta un sosten grandi pa tur esnan cu ta den e mesun proceso. Tur desaroyo nobo ta trece otro dimension cune y esaki no ta un excepcion. E hecho cu ta busca oido den prensa ta trece cune cu esaki por influencia e caso den su totalidad riba tereno social y huridico y no tur ora na un manera positivo.

Ki ora por considera un persona formalmente como sospechoso?

Ora for di hecho y circunstancianan tin e sospecho cu e persona, raporta of denuncia como sospechoso, a haci su mes culpabel na hechonan castigabel.

Mayoria biaha ta recomenda pa primeramente acumula mas tanto prueba posibel di e sospechoso prome cu confront'e cu e hechonan, pa siguiementemente bay deten'e. Sigura comprobante ta hopi importante den e caso aki. Ora via prensa ta trece dilanti cu un persona ta pedofiel prome cu Ministerio Publico a constata cu ta trata di un hecho castigabel, esaki por influencia e proceso di acumula prueba na un manera negativo. Por ehempel pasobra declaracionnan di testigo manera famia, bisiña, school, salud hubenil etc. por ser influencia door di e informacion aki den prensa. Con e mayor mester anda cu esaki? Kico ta mihor pa e mucha?

Un otro problema ta cerca kende mi mester hiba mi yiu? Cu kende ami como profesional por papia tocante mi sospechonan? Kico mi mester haci cu mi discrecion absoluto? Kende ta autoriza pa papia cu e mucha y samin'e?

Si ta necesario mester haci uso di e experticio medico di un medico huridico. Kende por eherce e funcion aki na Aruba?

Un problema grandi tambe ta, cu na momento cu a entrega un keho of denuncia cerca polis, no ta obvio ki factornan ta determina e sentencia den casonan di abuso sexual di menor. Tambe mester bin transparencia den e trayecto (huridico) cu victimanan di abuso sexual y nan famia mester cana.

Fundacion Respeta Mi ta comprende cu señala y reconoce abuso sexual cerca menor, no tur ora ta facil. Esaki sigur ta conta pa e (im)posibilidadnan diagnostico pa cu investigacion medico pa herida. Pesey un base (huridico) pa bon investigacion ta primordial. Nos na Aruba ta ekipa pa esaki? A bira tempo pa inverti den esaki.

E mucha no mag di bira victima di e fayonan den e proceso.

Pa mas informacion por pasa den siman entre 9'or di mainta y 1'or di atardi na Fundacion Respeta Mi, e fundacion pa prevencion di abuso di mucha, na Dominicanessenstaat 12. Atardi segun cita. Por yama e fundacion tambe riba 582-4433. Despues di ora di oficina semper por laga un mensahe riba e aparato di contesta y lo yama bek mas pronto posibel.

Oranjestad, 12 di october 2010